



廬山紀事卷之四

廣陵桑喬

山南自張公嶺東北行至七尖山

鶴鳴峯龜背峯寨雲峯黃石岩雙劍峯犀牛峯

香爐峯姊妹石

踰張公嶺迤邐東北行則至鶴鳴峯

南康志峯嘗有鶴棲鳴唐鄭元素隱其下

鶴鳴之西南為龜背峯又西南為寨雲峯黃石岩又西

雙劍峯

山疏龜背峯梅溪集南康舊志皆謂之行龜峯其南

有石如龜所謂行龜也今人謂之蝦蟆石
寨雲峯在龜背峯西今人謂之紅石崖

黃石岩在紅石崖南白樂天有黃石岩詩

雙劍峯在紅石崖西峯峭麗乃勝於山北之雙劍朱
晦翁有同尤延之提舉詠雙劍峯詩

雙劍之西爲犀牛峯雙劍之西南爲香爐峯又西南爲姊
妹石

山疏犀牛峯梅溪集謂之牛頭岩

香爐峯在雙劍峯西南視諸峯尤奇秀舊有黃石岩

今廢梁江文通從冠軍建平王登廬山香爐峯詩廣

成慶神鼎淮南好丹經此山具鸞鶴往來盡僊靈瑤
草正翕葩玉樹信蔥青絳氣下縈薄白雲上杳冥中
坐瞰蜿蜒俛伏視流星不尋遐怪極則知耳目驚日
落長沙渚層陰萬里生藉蘭素多意臨風默含情方
學松栢隱羞逐市井名幸承光誦末伏思託後旌

山疏姊妹石在香爐峯西南二石娟娟如兩女比肩

立

開先寺

鶴鳴峯下有開先寺

舊志開先寺者昉自李中主景後廢我明洪武初

僧清江復建永樂中僧智勝正統中僧道嵩繼脩天
順中僧大然請 賜額

黃廷堅開先禪院脩造記中主年十五先主秉吳國
柄鎮金陵留中主與宋齊丘參廣陵政事中主年少
好文無經世意慕物外之名問舍五老峯下有野夫
獻地焉買之萬金以爲書堂及卽位以爲寺以野夫
獻地爲已有國之祥故名開先及中主遷洪都蓋嘗
彌節故榻與畫像存焉太平興國二年賜名開先華
藏

中主讀書臺在寺後世以爲李後主者旣誤以爲梁昭

明者尤誤開州王泰公濟跋南唐後主李煜嘗從父
景徙豫章築書堂鶴鳴峯下俗誤以爲梁昭讀書
臺謬附郡志妄形題品迺據馮節度記攷正之如此
山疏王公濟知非昭明而不知非李煜是日察秋毫
而不見其睫也五代史李中主景遷都豫章留其子
煜使守金陵明年中主殂遺命煜卽於金陵嗣位煜
上宋太祖表亦云留居建業正儲副之位分監輔之
權曷嘗至豫章哉臺今廢有遺趾存

朝涼亭在讀書臺側今廢

聰明泉出朝涼亭遺趾下石竇中旱則流潦則竭泉

乃其於瀑布泉寺僧皆取食之然茶經不載

鎖劍亭招隱一山二橋俱在寺前

石剗七佛偈黃山谷書在讀書臺側崖半王守仁題

識正德己卯六月乙亥寧藩宸濠以南昌叛稱兵向

闕破南康九江攻安慶遠近震動七月辛亥臣守

仁以列郡之兵復南昌宸濠擒餘黨悉定當是時

天子聞變赫怒親統六師臨討遂俘宸濠以歸於赫

皇威神武不殺如霆之震靡擊而折神器有歸孰

敢窺竊天鑒於宸濠式昭皇靈嘉靖我邦國正德

庚辰正月晦提督軍務都御史王守仁書從征官屬

列於左方在讀書臺宋米元章青玉破三大字朱端

章廬山二大字周堯風泉雲壑四大字福祿壽三大

字明喬宇瀑布泉三大字林廷玉古今奇觀四大

字張宸濯纓洗耳噴雪奔雷八大字俱在青玉破郡

守青田趙與志寶祐戊午禱雨來此十五字在龍池

側餘刻甚多皆蘇剗不可識王禕遊開先寺記答淳

熙中南康守禱雨龍池而神龍見事具石壁所刻題

志中文石上多題名石麤字畫淺初不可辨掬水沃

之乃見大率宋南渡後人其人無聞者居多可識者

十纔二三君子惟植節砥行乃可不朽苟不出此雖

廬山紀事卷四
托名貞石未久人不識也

開先之僧紹宗禪師清耀禪師照禪師暹道者宗禪師行瑛禪師凡六人

山疏初開先之始建也Y山紹宗未尚寔主之南唐李中主遷豫章幸開先請紹宗上堂僧問何為開先境曰一條界破青山色何為景中人曰拾枯松煮布水

佛印了元禪師住持開先時手植松若干株於寺前株皆大數十圍蒼翠鬱然甚壯觀其後僧南楚越盡伐之去別建一寺俄而焚燬識者謂有數云

藝文

南唐馮延巳開先寺記皇上卽位之九年詔以廬山書堂舊基為寺寺成會昭義軍節度使馮延巳肆觀於京師上賜從容於便殿語及往事顧謂曰廬山書堂已為寺矣朕書堂之本意卿亦與知頗記憶否對曰陛下真誠懸日月微臣固陋何敢忘之答在吳邦唐運中缺陛下齡方志學龍潛鼎司洪惟聖心邈焉高蹈咳唾權政流贅經綸慕崆峒之師幾勞軒拜聞富壽之祝亦固堯辭注念煙蘿每懷宴息因尋爽塏之境以備華胥之遊匡廬天下之名山江表之勝槩

圖誌具載僊靈咸棲果有潛夫來獻茲地已酬善價
遽闢重基纔俾芟除未遑畚築旋則中興在運夏物
重歸陛下位屬元良務煩監撫寢門鷄唱方視燠寒
嵩高鳳鳴寧諧好尚逮乎出震嗣服雖欲從之巢父
之蹤其可繼耶堯舜不得已而治天下豈虛言哉方
今陛下日照天臨風行草偃勤儉以化焦勞思理求
賢草澤盡善於百王推公友于邁德於千古蟲蝗殞
于靈雨旱歉轉為豐年大信既孚四方後后威惟取
亂仁實懷柔所以建水僭稱肉袒而詣更楚邦亂畧
俛首而來朝矧彼長沙恃險與固隔絕聲教五紀于

茲一旦砥平易於反掌兵不血刃市不易肆拓土宇
於數千里復正朔於四十州可大之功冠乎史冊猶
且納陛軫慮馭朽兢懷物暢皇猷民知王度洋洋焉
蕩蕩焉混一車書豈遠乎哉言未及終上曰皆然矣
抑朕又聞古先哲王握圖御宇惟德是務與善同歸
俯仰抑揚不失其正久於其道而天下化成恒沙如
來出世濟俗依空說性性外無空信則脩崇悟則解
脫始乎正濃終乎象教使人趨清淨之域息貪競之
心民用以淳理道何遠是則菩提之教與政通焉朕
以此寺基是朕思欲遯世之地棄之則草莽可惜構

之則棟宇無名不若建興伽藍以居僧衆示人至理
亦助化之一端其矧置之規奢儉之度續用之費卿
復知耶延巳對曰起置之始適已上奏肇乎程土工
度山木豫章之材間出般輸之藝屢獻運斤若雨荷
鍾如雲力不勞於中民財不傷於外府歲月未幾厥
功已集駭多寶之湧出疑化城之突然邃殿正門重
軒複檻高牆虬轉脩廊翼舒香厨旁開僧房內闢灑
筵清淨宛是祇陀之園方丈精嚴更類維摩之室撫
菩提之地位儼如來之相好功成敏手則塑像如生
妙屬良工則丹青若活而况依林附麓左崑右壑瀑

布懸吕梁之勢凌雲挺閣峴之形溪徹湓江表灑流
之不斷峯開石鏡同慧日之長明其或寥次雲收戶
庭雨霽鐘鳴谷響猿啼樹深仰止則峻巘連空寫望
則長川無際僧閒境寂似出世間信有爲之勝因實
安禪之嘉所足使迷者得于陸之漸達者得不二之
門苟非聖人用心其孰能與於此乎上曰卿知其始
也旣如彼其末也又如此則文以記其事非卿而誰
延巳對曰臣才學本空筆硯久廢雖然盛德之事固
願歌詠慚匪當仁曷符不朽乃跪而進頌曰彭蠡之
陽廬山峻峙積純和氣竦堵天勢峯連奇秀谷藏靈

廬山經事卷四
異鶯洞之前勝復爲最懿乎我后河漕運契仁聖
文明肅恭敬畏堯舜其心巢父其志思憇大廷因開
福地帝出乎震龍飛在天梯航合運符瑞駢闐推公
固本舉正求賢九功旣叙七德俄宣貞師一奮建人
來庭神兵再發楚邦蕩平威震四海疆開百城日新
之盛無得而名恢恢睿謨游刃多餘乃思是境咎擬
華胥夙心不獲締構猶虛改名梵宮俾奉真如榛蕪
旣闢棟楹崛起雕甍繡櫺重欄疊砌後倚崇崖前臨
無地屈曲延袤高低迤邐炳煥丹青端嚴塑像表上
乘灑示人天相清衆晝開禪關夜敞十二類生孰不

瞻仰聖君旨趣古佛因緣教化之本治平之原其功
莫量其福無邊皇圖帝齡永永萬年保大十二年正
月日立石

黃山谷開先華藏禪院脩造記夫沙門灑者不住資

生行乞取是日中受供林下託宿故趙州以斷薪續
禪牀宴坐三十年藥山一日不作則不食今也毀中
民百家之產而成一屋奪農夫十口之飯而飯一僧
不已泰乎夫不耕者燕居而玉食所在常數百是以
有會昌之籍沒窮土木之妖龍蛇虎豹之區化爲金
碧是以有廣明之除蕩可不思耶

皇明李夢陽開先寺詩讀書臺倚鶴鳴峯迴合千山
翠萬重白晝懸泉喧霹靂清秋雙劍削芙蓉撐持古
寺還雲閣寂寞前朝白暮鐘瑤草石壇應不死興來
真欲跨飛龍又宿開先寺詩僧閣暮鐘靜夏涼風色
幽月出照瀑布猿啼西澗流不計恨不令今出覽中
參政朱應登陪喬侍御自白鹿洞遊開先寺詩鹿洞
意已愜龍池渴未消還隨持節使重過濯纓橋沙水
涼生襪捫蘿翠染綃行行渾不倦去去卽非遙路轉
山交股峯迴草沒腰險中頻却馬狹處僅容輶異跡
多存古幽期自遠巖石眠聞晉史臺隱記梁昭泉似

中天落雲疑萬壑搖南風清泐峻西日下岑寥選勝
欣初霽探奇遂詰朝浮嵐頻近眼五老若爲招

系喬生曰廬阜之南僊佛之宮以十數開先最勝勝乃在
諸峯瀑布開先雖平麓然諸峯瀑布可指顧而盡又去
城近士大夫舟車易往來諸宅菴寺雖奇然僻在山腹中
邃險好奇者或間至馬亦不能數矣

黃岩寺

雙劍峯下有黃岩寺

山疏黃岩寺唐僧智常建

文殊塔在黃岩寺南下塔前有定心石舊志謂之四

望石

劉軻黃石岩禪院記庚辰歲山客劉軻採拾怪異自麓至頂却下半里餘次于黃石岩岩中有棲禪子不知其幾臘乃贖其輕重頗見其宅心之地乃問其住年但手指松桂云毫髮我植今環人臂鳥飛兔走吾復何齒矧卯戌之昏且霜炎之凍炎生落之榮頽去留之洽泝雖云云自彼而於我蔑如也於戲向非巖房峭絕孤峙則人境兩失其宜也復何言哉觀夫煙雲雜乎復鳥嵐靄生於襟袖群形浩擾併入眸子每至煙雨初霽山光澄練冷冷倦語如在耳右况又嘗

凌兢上冥冥焉知不能與洪崖接袂浮丘連駕盈縮造化吐納灑氣絕慚容於厚面遠喧卑之臊穢乎不得而然者蓋鉤也餌也名為利鉤利為名餌吞鉤食餌手足羈鎖彼焉得跳躍於此乎夫禪子脫去桎梏四支宣展動與雲無心靜將石何幾物我一致端邪徑塞僕所謂非斯人不能住斯境也禪師宜春人俗姓劉名常潯人以師久住遂以其姓易其巖名云

香爐峯麓有李太白書堂

山疏李太白書堂在青玉峽西一里所今廢白蜀人也嘗讀書於蜀之大匡山其後供奉翰林不合而歸

又讀書於潯之匡山杜子美贈白詩曰匡山讀書處
頭白好歸來是也白善為歌詩連類引義宏肆俊偉
殆騷人所不及近世所未有蘇子瞻嘗恨白集為庸
俗所亂近唐詩紀事又載左綿邑人所哀白少年詩
若干皆皆淺俗可笑讀者自可別其偽云

瀑布泉

鶴鳴龜背之間有馬尾水雙劍之左有瀑布水瀑布之下
有布水臺又下有青玉峽龍池龍池南下有小池曰浴僊
池

山疏漢陽之頂多清泉的突播流西為康王谷之谷
簾泉而東為開先二瀑二瀑同源異流其在東北者流
鶴鳴龜背之間曰馬尾水水勢奔注而崖口窄隘通
束噴散數十百縷如馬尾然其實亦一瀑也其在西
南者則自坡頂下注雙劍峯背遂壑中匯為大龍潭
繞出雙劍之東下注大壑懸掛數十百丈曰瀑布水
水循壑東北逝與馬尾水合流出兩山山破中下注
石潭石碧而削水練而飛潭緝而淵為開先佳境後
因名其破曰青玉破潭曰龍池云二瀑俱奇觀而西
瀑尤勝方冬泉脈微循崖而流涓涓然如一綫春夏
汎溢直落霄漢間裊裊如垂匹練日光灼之粲爛如

廬山經事卷四
黃金色倏為驚風所掣則中斷不下久之忽飄入雲際如飛球捲雪迸珠散玉瞬息萬狀

周景式廬山記瀑布水在黃龍東北數里土人謂之泉湖水出山腹中掛流三四百丈飛湍出林表望之如懸索水所注處石悉成井溪不可測

文與可妙明菴記樓巒石橋為混沌之所設般工能之開先瀑布不可量其高遠奔騰傾瀉若決銀河此天下之絕觀世間不復更有矣

山疏山上下龍潭以十數惟雙劍峯背大潭深不可測神龍時來居之來則雲陰旋合屯潭上不散者久之

其去莫測也龍在則時時洗潭其洗潭即湧水雖晴霽亦暴漲騰湧混濁穢穢墮梗皆隨流去不遺王禕遊開先寺記予以三月二十六日雨霽同諸君往遊時瀑水方怒瀉奔騰盪激聲震萬雷令人心怖神奪股栗不休雖諸君拍手謹呼大笑然水聲瀕洞呼笑聲亦不之聞也寺僧云龍適洗潭矣

布水臺在瀑布泉下五燈會元唐先天元年道明禪師得六祖慧能開發了悟本性即往廬山布水臺住

三年方之袁州

南康志龍祠在青玉峽石壁間後廢宋乾道間郡守

李亦脩又廢我 明正統中僧南嶽崧復脩又廢

石亭集舊志龍池水支流石間宋僧若愚鑿大石渠

長丈承以石柱聯絡數十引水過漱玉亭龍井入僧

廚注大石槽中以給庖湔溢則散流山下其後稍損

折代之以竹

山疏龍井者僧當水所行道鑿石為池曰龍井亭於

其上曰漱玉亭水瀉龍井中泠泠有聲今並堙廢而

於其上別立小石塔以當之無復漱玉之勝矣蘇東

坡有漱玉亭詩王禕遊開先寺記由寺至亭可二百

步由亭至破口僅數十步自遠觀之瀑布出自兩峯

間如瀉天半由近而觀則二瀑下注匯為重潭潭水

出石破乃為溪循山足東流以入於彭蠡當破口仰

望但見水從潭中出巖谷回互二瀑所從來不復可

見矣龍池東南舊有萬竹亭今廢

紀事白樂天刺杭州時徐凝張祐並希首薦樂天試

長劍倚天外賦餘霞散成綺詩解送凝為元祐次之

祐曰予甘露寺詩日月光先到山河勢盡來金山寺

詩樹影中流見鐘聲兩岸聞雖綦母潛塔影挂青漢

鐘聲和白雲未足為佳也凝曰爭如老夫廬山瀑布

詩今古長如白練飛一條界破青山色耶凝遂擅場

蘇東坡志林徐詩至為塵陋世人又偽作樂天稱賞
語樂天雖涉淺易然豈至是哉因戲作一絕帝遣銀
河一派垂古來惟有謫僊詞飛流濺沫知多少不為
徐凝沈惡詩詩話東坡以徐凝為惡詩然太白銀河
落九天猶未免凡近也

唐詩紀事繆島雲瀑布一聯云白鳥遠行樹玉虹孤
飲潭夔出前輩為時所稱島雲初嘗為僧詩尚奇險
詩史唐宣宗嘗與黃蘗禪師觀瀑布蘗吟曰穿山透
石不辭勞地遠方知出處高宣宗應聲曰溪澗豈能
留得住終歸大海作波濤蘗知非常人云

李夢陽觀瀑布賦空炎陽以北邁兮迥敷原之上疆
遵嶽南而遐陟兮廓晴流而志揚日旒旒以景撫兮嶰
崎嶇乎微行峯吞吐而迂余兮嵐押翕而颺路超歸
宗以翹盼兮觀開先之瀑布諗前記而髣髴之兮眩
飛空之孤形誦銀河之逸句兮精陟天而九征挾巖
潭以上氣兮接神漢而竝垂積雲左右以傳彩兮霞
表裏而秀姿沫霏霏之晝霧兮崖卅翠滌而蕤蕤光
金黛而亘霄兮浩呼洶之湧湧龍朝帝以潮從兮虹
為梁之總總韡若華以西曜兮東扶木兮倚明星辰
活而布鎔兮岳瀆影之其中絢練恍惚百恠潛兮勢

明晦而無恒語之若住忽奔噴兮石雷壑而驟崩經
香爐以慰紫兮破雙劍而水攢踰黃巖以珠迸兮籠
玉殿而金煙濯炎女之玄髮兮苔離根而永生掛洞
宮之幕幕兮隱芝箭而懷清沸混混之爛爛兮飈瑟
駭而涼風泉滾滾而安竭兮孰尋源而卒窮志劃劃
以繙紛兮溼華巔而分派水簾亞之揚兮靈終古而
弁戴巍嶽岑而上行兮疑質達而性非蒙并厥流常
兮磨鍼顛而血隨吞日月以膏顏兮震雲氛之翼翼
江海巨而昏墊兮哀趨卑而罔直體融陰而內陽兮
準坎離而向背嚴不蓄類迺澤物兮醜彭蠡之汪濊

浮朱鳥之寒景兮爭龍騰而攄掣勢高者韻斯下兮
谷哨啄而坤坼赫翩翩以條助兮小鴈蕩而不暘露
霜霾而離離兮處遼域而孰之惻怒琇罕以思逞兮
石岵峪之峒峒晴電追而霆突兮信駭觀而搖臆猿
纍纍以竊窺兮倚石鏡而呶嘯燿焯灼的樂校兮
類至人之懸照胖颯而逞徠兮翔太始而留耀歌曰
造龍池而缺之兮究瀑布之肇踪巔湧而壑射兮誠
神靈之攸鍾轟邇惑而遐暝兮壯二儀而求效磬鬼
怪避鑑鑒兮微瀑孰以察逝者之高妙伊動者必定
兮潭窅沕而淵峯礫之灑而寧之清兮厥金水之共

置此去變化誰能了又湖口望廬山瀑布泉詩萬丈
紅泉落迢迢半紫氛奔流下雜樹灑落出重雲日照
虹霓似天清風雨聞靈山多秀色空冰共氤氳飛流
李白瀑布泉詩日照香爐生紫煙遙看瀑布掛長川
飛流直下三千丈疑是銀河落九天又瀑布泉詩西
登香爐峯南見瀑布水掛流三百丈噴壑數十里歛
如飛電來隱若白虹起初驚河漢落半灑雲天裏仰
觀勢轉雄壯哉造化功海風吹不斷江月照還空空
中亂濺射左右洗青壁飛珠散輕霞流沫拂穹石雨
我遊名山對之心益開無論漱瓠液且得洗塵顏但

諧夙所好求願辭人開

桑喬生曰廬山上三石梁據張正見簡寂觀詩三梁石本
絕梁元帝廬山碑東瞻洪井西望石梁則三石梁當在簡
寂觀之墟而李太白有銀河倒掛三石梁之句元李洞言
開先寺上有三石梁橫絕青冥窅不見底則似在開先之
後舊志但云在縣西三十里而一統志九江南康二府新
志於上霄紫霄二峯皆言有石梁黎景高又云在五老峯
上夫三石梁爲廬山絕景其奇詭尤在壘泉瀑布之上天
台一梁猶可擅美况三梁哉數公旣皆名筆又嘗親至廬
山黎景高李溉之又同時人而所云各殊何也乃今遍訪

鶴鳴五老與紫霄之西杳無所謂三石梁者豈諸所云云
皆空言哉姑記所疑於此

洪井山

香爐峯南有小山是為洪井山其下有丹井善政源

山疏洪井山在東古山觀音岩西北隅香爐峯之支
也相傳葛洪真人鍊丹處其下有丹井

善政源在洪井山下源石池也不涸不溢多菰草

或曰洪井者洪厓先生所隱處非也洪厓有二其一
伶倫三皇時得僊號稱洪厓先生正神僊傳所記與
衛叔卿遊於華山郭璞詩所謂石拍洪厓肩者也其

一唐張氲晉州神山人隱姑射山開元十六年嘗至

洪州救疫亦號洪厓先生然古洪厓所得道處在豫
章後人於其地立祠祀之因並祀氲豫章古今記所

載洪厓洪井鸞岡風雨池皆豫章地非此山事

南唐李中主遷豫章時嘗幸洪井山

東古山鳳凰山清流菴錦屏山石照山

鶴鳴之南有山四曰東古曰鳳凰曰錦屏曰石照鳳凰之

上有清流菴

山疏東古山在縣西南十里山與鶴鳴龜背鄰其麓

有釣臺

舊志鳳凰山在縣西南十里山蜿蜒特起五十餘丈湖漲則山若浮而高如鳳翔一名流星山昔城山疏自鶴鳴東走並彭蠡至南康別有山曰錦屏山其下有錦屏鋪山與東古西古黃龍諸山聯絡非九疊屏

南康志石照山去縣西十五里潯陽記石照山有圓石依崖明淨如懸鏡然

遷鶯谷鼓子岩慶雲峯

鶴鳴之東有遷鶯谷谷有何乾曜墓

山疏鶴鳴龜背當漢陽東南微龜背當微下鶴鳴屠

微東為漢陽東隅諸峯之首山勢北趨而稍東盡乎

瘦馬嶺而七尖胡鼻五乳諸山皆屬焉

舊志遷鶯谷竹木滋茂有水泉

唐何乾曜不知何許人仕為侍郎後隱廬山卒葬此

谷

遷鶯谷上有鼓子岩

山疏鼓子岩舊志謂之古寺巖在鶴鳴峯東遷鶯谷

上其下有鼓子岩今廢

舊志初至正己亥盜邢萬戶陷南康據之半年所南康儒士黃虞吏周機等以義兵復之已而兵敗皆見

殺無何江西僉事韓準至邢萬戶遯準尋去廬山砦
將張野雞來據之陳友諒至南康野雞降辛丑八月
我兵下江州遣同僉邵伯忠招撫南康野雞遯而西
其後友諒敗亦見殺野雞不知何砦將或曰嘗駐鼓
子砦云

鼓子砦西南有李驥山

山疏山四高而中下亦管人所立砦處

鼓子砦東北為慶雲峯

山疏慶雲峯它冊籍皆不載土人亦云無是峯迺獨
載於李夢陽遊山記意必別有所據亦或謂其峭麗

而特名之如郎官湖耶抑亦以慶雲菴故遂名之慶
雲耶姑載之

萬杉寺

慶雲之下有萬杉寺

舊志萬杉寺者故慶雲菴也宋景德中僧大超有戒
行受知仁廟嘗卽山手植杉萬本天聖中賜今名并
御書金僊寶殿額後兵燬舊有慶雲曉翠二亭亦燬
洪武四年僧德昭重建二十六年設為講寺叢林今
漫廢

山疏三分池在寺後池水出於山椒寺僧作石龍晉

引水出龍口中下注池石水跳躍如珠因更名散珠池亭其上曰散珠亭並廢

萬杉之名僧二曰壽堅禪師曰紹慈禪師

石剝相傳萬杉石剝甚富僧皆踏而瘞之惟宋仁宗國泰清淨四大字槐京包篆龍虎慶嵐四大字存焉在寺之後山

程叟德安王阮嘗從張紫微季祥學詩紫微罷荊州歸與阮偕遊萬杉紫微大書二章曰老幹參天一萬株廬山佳處著浮圖祇因買斷山中景破費神龍百斛珠莊田本是昭陵賜更著官船載御書今日山僧

無飯喫却催官欠意何如阮撫然不滿曰先生氣吞虹霓今少卑之何也紫微不復言別纔兩句而得湖陰之訃紫微蓋於此絕筆焉阮是時亦有詩曰昭陵

龍去奎文在萬歲靈杉守百神四十二年真雨露山川草木至今皆紫微大擊節自以為不及既而阮又過萬杉題碑陰曰碧紗籠底墨纔乾白玉樓中骨已寒淚盡當時聯騎客黃花時節獨來看亦紆徐有味

云潯陽舊志王阮字南鄉韶曾孫也少好學尚氣節隆興初進士對策極言宜遷都建康以圖進取紹熙中知濠州脩戰守具金人不敢侵改知撫州韓侂胄

一廬山外記卷四
聞阮名特命入奏對阮對畢卽出關侂冑大怒批旨
予祠遂隱廬山

朱文公萬杉寺詩休沐聊命駕駕言何所之行尋慶
雲寺想像昭陵時門前松逕深屋後杉色奇空山歲
年晚鬱鬱凌寒姿當年雨露恩千載有餘滋匠石不
敢睨孤標儼相持更啓石室藏仰瞻天象垂願以清
淨化萊爲太平基

萬杉迤東水之大者爲清泉澗

山疏俗呼青天澗五老峯以西諸水之委也水西南
行過九洪橋入於彭蠡湖

七尖山

慶雲峯東北有山是爲七尖山

山疏南康志慶雲峯下有劉軻劉弁薛漑三書堂今
人無復知慶雲者疑卽七尖山也

其下有劉軻書堂

山疏劉軻者徐之沛縣人也天寶之亂自淮入湘至
韶州爲僧師事月華寺僧惠朗卽大小朗也後居羅
浮讀黃老書從壽春楊生授春秋元和初乃踰嶺隱
廬山萬杉之東與隱士茅君游元和末登進士官監
察御史殿中侍御史秘書丞史館脩撰終洺州刺史

有文章名名乃與韓柳並稱當其隱廬山時東西二
林碑記多其所撰皆不存書堂後廢為凌雲菴今亦
廢

撫言軻為僧時嘗葬遺骸其夜夢書生來謝與之三
鷄卵軻嚼一而吞二後遂精儒術與吳武陵並以叟
才直叟館韓愈欲為文贊之會貶去不果

劉軻上座主書軻本沛上耕人代儒業為農人家天
寶末流離於邊徙貫南鄙邊之人嗜習翫味異於沛
然亦未嘗懈耕捨學與邊俗齒且曰言忠信行篤敬
雖蠻貊之邦行矣故處邊如沛貞元中軻僅能執經

從師元和初方結廬於廬山之陽日有芟夷畚築之
役雖震風凌雨亦不廢力大耨或農圃餘隙積書窻
下日與古人磨礪前心歲月悠久寢成書癖

劉軻與馬植論叟書自叟記班漢已來秉叟筆者予
盡知其人矣言東漢有若陳宗尹敏伏無忌邊韶崔
實馬日磾蔡邕盧植司馬彪華嶠范曄袁宏言三國
志有若衛顛繆襲應璩王沈傅玄茅暉薛瑩華覈陳
壽言晉洛京叟有若陸機東晉王詮詮子隱言江左
叟有若鄧粲孫盛王韶之檀道鸞何法盛臧榮緒言
宋叟有若何承天裴松之蘇寶圭沈約裴子野言齊

史有若江文通吳均言梁史有若周興嗣鮑行卿何
元劉璠言陳史有若顧野王傅宰陸瓊姚察察子思
廉言十六國史有若崔鴻言魏史有若鄧淵崔浩浩
弟覽高允張偉劉橫李彪邢巒溫子昇魏收言北齊
史有若祖孝徵陸元規湯休之杜臺卿崔子發李惠
林林子百藥言後周史有若柳虬牛弘令狐德棻岑
文本言隋書有若王師邵王胄顏師古孔穎達于志
寧李延壽言皇家受命有若溫大雅魏鄭公房梁公
長孫趙公許敬宗劉胤之楊仁卿顧胤牛鳳及劉子
玄朱敬則徐堅吳兢次而脩者亦近在耳目於戲自
東觀至武惠已來其間作者遺草有未行於時及脩
撰未旣者聞並藏於史閣固非外學者可究予雖無
聞良史至於實錄品藻增損詳畧亦各有新意常欲
以春秋條貫刪補冗闕掇拾衆美成一家之書言不
多乎哉存之視予力志何如耳

白樂天代書廬山自陶謝泊十八賢已還儒風綿綿
相續不絕貞元初有符載楊衡輩隱焉亦出爲文人
今讀書屬文結草廬於岩谷間者猶一二十人其秀
出者有彭城劉軻開卷慕孟軻爲人秉筆慕楊雄司
馬遷爲文著翼孟三卷參龍子十卷雜文百餘篇聖

人之旨作者之風雖未臻極往往而得予佐潯陽三年軻每著文輒來示予予知軻志不息異日必能跨符楊攀陶謝軻一旦盡齋所著書及所為文訪予告行欲舉進士予方淪落江海不足發軻事業又羸病無心力不能徧致書於臺省故人因援紙引筆寫會中事授軻曰持此為予謁集賢廨三十二補闕翰林杜十四拾遺金部元公監察牛二侍御秘書省蕭正字藍田楊主簿兄弟彼七八君子以予愚直常信其言苟于今不我欺則子之道庶幾光明矣三月十三日樂天白

劉弁書堂

通攷劉弁者廬陵安福龍雲鄉人也登元豐二年進士紹聖詞科仕為著作佐郎侍御史卒所著有龍雲集南郊賦氣格近西漢詩書序記祖述韓柳銘誌豐腴規模文忠於廬陵後進足繼六一云書堂今不知處

薛漑書堂

宋史漑嗜酒不自檢束為文辭剗剔瑕類卓詭不凡舊志薛漑宋人右補闕登之後號書倉為南海書記秩滿入廬山築室居之扁曰薛處士山堂後起為諫

議大夫未幾復歸山題舊隱壁曰重來間院靜喜對
故山青時服其文雅書堂今不知處

桑喬生曰劉軻言四事利害明甚然卒不見被之設施蓋
難之也論叟書述兩漢以還作者詳矣故掇其要於篇

廬山紀事卷之四終

廬山紀事卷之五

廣陵桑喬

山南自七尖山東北行至舍鄱口

棲賢谷

七尖山東北有大谷是為棲賢谷

山疏棲賢谷值舍鄱口南三峽澗出焉廬山之谷以
三數棲賢谷為大又多奇勝人尤樂遊之云

舍鄱口

棲賢谷其最北山巔為舍鄱口

山疏舍鄱口在舍鄱嶺東南乃天池之南道口何鄱

湖而峻勢若可吞鄱湖故云天啟之南

水經注嶺南有大道順山而下有若畫焉傳云匡先

生所開通江道巖上有宮殿故基三以次而上最上

極於山峯合為大又為奇湖入水樂成之云

山疏含鄱口南曰砦口其下曰能邪有石曰大石斗

笠石

砦口東南有白龍潭水自山巔下注潭中俗謂之白

水漕

白石菴

含鄱口西有寶陀羅漢二岩其水曰野人源有僧舍曰楞

伽院

山疏楞伽有上下二院在能邪西今廢張孝祥有詩

院內有白石菴

山疏白石菴者宋李常公擇讀書處也公擇都昌人

少與兄弟讀書菴中已而皆及第公擇以文學政事

名當時蘇東坡嘗與之倡和黃山谷者其甥也元祐

更化以常為三司使或言常少幹畧司馬光曰使天

下知吾意不惑於利

公擇在朝時以詩寄菴僧端老云煩師為掃山中石

待請歸時欲醉眠然竟不克歸菴亦旋廢其後西蜀

人李復亦嘗居之而易其名曰白雲菴復死亦廢其
後勝國時豫章有熊處士者亦卽其趾築室居焉憲
幕官范祥寄詩云尚書舊隱在匡廬傳道新來事已
墟祠宇又令誰薦菊鬼神猶爲護藏書石泉宛宛通
池細川樹冥冥映日踈爲問豫章熊處士幽柄消息
近何如後亦廢

公擇旣賢乃藏書九千卷於菴中以俟觀者蘇東坡
李氏山房藏書記象犀珠玉珍怪之物有悅於人之
耳目而不適於用桑麻布帛五穀之材有適於用而
用之則弊取之則竭悅人之耳目而適於用用之而

不弊取之而不竭賢不肖之所得各隨其本仁智之
所見各當其分本分不同而求無不獲者惟書乎孔
子聖人其學必始於觀書當是時惟周之柱下史聃
爲多書韓宣子適魯然後見易象與魯春秋季札聘
於上國然後得聞詩之雅頌而楚獨有左史倚相能
讀三墳五典八索九丘士之生於是時得見六經者
蓋無幾其學可謂難矣而皆習於禮樂深於道德非
後世君子所及自秦漢以來作者益衆紙與字畫日
趨於簡便而書益多世莫不然學者益以苟簡何哉
余猶及見老儒先生自言其少時欲求史記漢書而

不可得幸而得之皆手自書寫日夜讀誦若不及近
歲士人摹刻諸子百家之書日傳萬紙學者於書多
且易致如此其文辭術業當倍蓰於替人而後生科
舉之士皆束書不觀遊談無根此何也余友李公擇
少時讀書於廬山五老峯下白石菴之精舍公擇既
去山中之人思之指其所居爲李氏山房藏書九千
餘卷公擇既涉其流探其源剝其華實而咀嚼其膏
腴以爲已有發於文章見於行事以聞名於當世矣
而書固自如也未嘗少損將以遺來者供其無窮之
求而各足其人本分之所當得是以不藏於家而藏

於其故居之僧舍此仁者之用心也余旣衰且病無
所用於世惟得數年之間以盡讀其所未見之書而
廬山固所願遊而不可得蓋將老焉盡發公擇之藏
而拾其餘棄以自補庶有益乎而公擇求余文以爲
記乃爲之言使來者知替之君子見書之難而今之
學者有書而不讀爲可惜也熙寧九年九月朔記

蘇東坡志林李公擇喜墨見人有佳墨卽攘取之它
日客有自公擇所來者爲言公擇懸墨滿堂此亦通
人之一蔽也

山疏菴舊有三賢祠以祀李公擇李公南蘇東坡今

廢公南者公擇之弟李布也博學有俊才與公擇齊名時號二李東坡詩何人脩水上種此一雙玉蓋指此也布早卒公擇兄莘亦讀書菴中博學能文章然名不逮二李仕至轉運使

楞伽院鐘樓舊有崇德縣君所畫二墨竹今不存崇德縣君者公擇之女黃山谷之姨母也善繪事黃山谷嘗為作崇德縣君墨竹詩

太乙峯犁頭尖山桃林山萬壽寺

合鄱口西南為太乙峯其下有老鷹崖

舊志太乙峯在廣壽院前廣壽院在行龜峯下

山疏廣壽院在萬壽寺東廣水坂內峯在寺基北峭

削與眾峯殊故名太乙山南人謂之大犁頭尖

德勝龍潭在峯西南

太乙峯水東南行逕萬壽寺與眾水會

太乙峯南為犁頭尖山

山疏山南人謂之小犁頭尖

太乙峯西南為桃林山山西南與漢陽峯接

山疏老鴉口在桃林太乙之間長壠在桃林漢陽之

間

桃林澗水東北行逕萬壽寺與眾水會

犁頭尖山之南有萬壽寺

山疏萬壽寺唐僧惠英建後兵燬我明正統中僧

明安重建

寺北有百花園今廢寺南有水曰萬壽源

雨岩黎僊峯廬山寺

萬壽寺西南有山巍然高者漢陽峯也其上有雨岩

舊志雨岩在漢陽峯南黝而深晝日嘗黯黯天將雨嘗有雲氣出其中故取傳岩之義名焉

黎僊峯

新志黎僊祠在廬山絕頂女真黎氏所棲隱處也黎

既僊去人因祠祀之其後禱雨輒應復繪像祀之祠今廢

山疏漢陽坡上有廢塚蓋二氏居此山者所葬處也世謬傳以為漢王塚又言其疑塚三十六寧藩之亂南康人有欲盜伐之者以莫知孰為真塚而止

廬山寺

山疏廬山寺在漢陽坡上今廢

高僧傳晉僧曇翼宋僧慧慶道慧並嘗住廬山寺

喜劉存虛廬山寺詩孤峯臨萬象穠氣何高清庭際

南郡出林端西江明山門二緇叟振錫聞幽聲心照

有無界業懸前後生徒知真機靜尚與愛網并方晉
金門路未遑參道情

揚衡廬山寺詩千峯白露後雲壁掛殘燈曙色海邊
日經聲松下僧意閒門不閉年去水空澄稽首如何
問森羅盡一乘

鄭常送頭陀赴廬山寺詩僧家無住著早晚出東林
得道非真相頭陀是苦心持齋山果熟倚錫野雲深
溪寺誰相待香花與梵音

進士馬戴廬山寺詩白茅爲屋宇編荆數處塔堦石
疊成東谷笑言西谷響下方雲雨上方晴鼠驚樵客

緣蒼壁猿戲山缺撼紫樅別有一條投澗水竹筒斜
引入茶鑪

三峽澗

棲賢谷之水其會爲三峽澗澗在萬壽寺東南

山疏萬壽寺東南行龜峯之末衆水之所會也凡能
邪迤東團山黃石諸水能邪迤西桃林長壠諸水小
大支流九十有九皆入於三峽澗澗有洗馬池

蘇子由棲賢寺記棲賢谷中多大石岌業相向水行
石間聲如雷霆如千乘車行者震掉不自持雖三峽
之險不過也蘇東坡志林讀子由記便如在堂中見

水石陰森竹樹膠轕僕當為書之刻石堂上亦欲與廬山結緣它日入山不為生客也

瘦馬嶺烏石崖山石佛山石佛寺紅石崖山

漢陽之徼東北行曰瘦馬嶺

山疏瘦馬嶺在萬壽寺西山巉削骨立如裂其上有

烏龜石

瘦馬嶺東為烏石崖山

山疏雙澗口在烏石崖東水岐而二其一出七尖山

廢寶慶寺其一逕石佛寺而南

烏石崖東為石佛山其下有石佛寺

山疏山有三峯竝峙如佛

南康志青蓮菴即石佛寺宋僧桂林建後兵燬宣德

中僧普營重建

煎魚澗在寺東南雙澗口水也滴水崖在寺東然不

常滴

石剝石佛寺三大字

石佛山東北為紅石崖山

石人峯繡鉢峯棲賢寺

烏石山東南小山有石特立如人者石人峯也

舊志石人峯在棲賢寺側山有石拳聳如人狀

石人峯上有峯圓如球者繡球峯也

舊志繡球峯在石人峯北

石人峯下有棲賢寺

山疏棲賢寺者亦李渤讀書處也以渤故謂之棲賢

然寺之創則自赤眼禪師始洪武中寺以造偽鈔廢

飛錫泉在寺後槽斷泉在寺東赤眼泉在寺西廢靈

峯菴後

王禕遊棲賢寺記寺右倚石壁左俯流泉石壁之趾

僧堂在焉狂峯怪石翔舞簷上每大風雨堂中之人

疑將壓焉習廬山者曰雖茲山之勝棲賢蓋以一二

數矣又曰風雨初散日光穿雲斜照峯上巖谷石

芒采相射宛然金芙蓉也

棲賢寺有駐節亭愛堂應真閣劉西澗祠

山疏駐節亭在寺側南唐元宗遷豫章時常幸棲賢

因建亭焉今廢

祖無擇愛堂在寺側初無擇守南康能愛其民民亦

愛之無擇數遊棲賢既去民為建堂曰愛堂今廢

應真閣在寺內元學士虞集詩輒入禪關裏飛行看

石淙應真誰具葉受供此珠宮噴薄方無極泓澄自

有容餘波第六水取次濯凡踪石澗容飛渡緣山入

翠煙開門觀五老敷席近諸天試共龍聽癩閒隨客
酌泉替人行履處一一問藍田閣今廢
劉西澗祠在寺側朱晦翁建今廢
寺西北邃谷中有赤眼禪師塔巖谷深絕人迹罕至矣
棲賢之僧懷祐道欽智筠慧圓澄湜道堅知遷祖覺辨首
座凡九人

寶訓辨首座謂東林僧混融曰衲子事華巧無實德
如盛丹腹飾敗舟以之涉江湖犯風濤能無危乎

王淵潭

棲賢寺東為王淵潭

山疏王淵潭在三峽澗中諸水合流奔注潭中驚湧
噴空瀉下三峽潭上有白石如羊橫亘中流故名王

淵

元學士李洞漑之記由開僊肩輿至三峽橋橋有飛崖
因相與列坐其上瞰流投石訇然出淙射中樹兩涯
深鬱蔥禕月宿其表顧瞻長壑勢委蛇來覺景會而
神移也因起步入松逕可二里許至王淵潭四山忽
開敞由中出奔湍注潭上其怒響與山遠近蓋三峽
遊景之尤奇者徘徊久之陰潭生風毛髮盡豎若有
龍居獄靈出入左右不可留也姑記而去延祐二年

二月十有三日同遊陽平樊煙塢門文矩

棲賢寺記王淵之東水平如白練橫觸巨石匯為大車輪流轉洶湧窮水之變

石劖張孝祥王淵二大字餘皆蘇剝不可辨

棲賢橋

王淵之南有棲賢橋

舊志棲賢橋在楞伽西南五里

山疏棲賢橋者三峽橋也作於宋祥符間其長幾百尺橫絕大壑締構偉壯神施鬼設非人力所能為從橋上俯視澗底大較可百餘尺或曰以瓶貯水五升

許從瓶甬出水縷縷下注瓶竭水乃至澗底此未足

憑

棲賢橋傍石罅中有小白石日映之則見五色光

南康志王峽亭在棲賢橋西正德中知府陳霖建亭

壁鐫錢聞詩棲賢橋詩又劉廷誥汪伊詩

觀音亭在王峽亭南

南康志飛來亭唐大曆中因風雨飛來故名半石半

木以祀觀音今廢

朱文公棲賢磨崖志新安朱熹奉陪高川蘇史君閬中錢別駕簽書楊子美博士楊元範星子王之才武

寧楊子直邗郢缺仲衡濂溪周師溫同遊臥龍遂至
王淵三峽門缺缺缺王翰缺缺愉幼子在從淳熙已
亥四月上缺石劄三峽橋三大字又端午并缺日徘徊
缺缺庚寅缺境界缺或峽橋立缺自尋真至清缺
雒陽吳缺誠伯又嘉定己卯四月缺莆田陳宓與客
來李夢陽廬山記路傍草間有石鮮不刻也然莫能
盡記

宋黃山谷棲賢橋銘二山劔立龍落天路北垂康王
之簾南曳開先之布銀河傾瀉起蟄千雷斲山為梁
無有壞墮驪龍守珠不可釣罩式告游者見危思李

蘇東坡三峽橋詩吾聞泰山石積日穿綫溜况此百
雷霆萬世與石鬪溪行九地底險出三峽右長輪不
盡溪欲滿無底竇跳波翻潛魚震響落飛狄清寒入
山骨草木盡堅瘦空濛煙雨間瀕洞金石奏彎彎飛
橋出湫湫半月鼓玉淵神龍近雲雨亂晴晝岳瓶得
清甘可嚙不可漱

參議孫應鰲棲賢橋詩雨霞變幻少定色掃石共坐
巖溪頭鐵船紫霄峯獨秀金井玉淵山更幽巾裘隨
意郭文舉獵釣無心翟祖休采采僊源有靈藥得之
還贈同心儔

樓賢橋下有龍潭曰金井

山疏橋下兩涯石皆紫赤角立軒軒然如壯士戴橋立李空同所謂峽石肝爛者也橋之所踞實為得勝地焉

石劖維皇宋大中祥符七年歲次甲寅二月丁巳朔建橋上願皇帝萬歲灑輪常轉雨順風調天下民安謹題四十大字福州僧德朗勾當造橋建州僧文秀教化造橋江州匠陳智福弟智汪智洪二十九小字又治平改元甲辰閏五月二十日大理缺事簽書判官廳公事楊度題又天章閣待制田喻賢忠太常博

士胡况度臣缺中丞蔡巽子發皇祐元年四月十八日遊又馬朋金井二大字餘刻多不能盡錄

樓賢橋北有石梁

山疏橋北十數丈有石方整如棺而大橫亘澗上俗謂之棺材石

黎崩紀遊集相傳嘗有孽蛟從谷中出水怒湧勢且壞橋時樓賢有異僧叱神挽此石扼之蛟退橋得不

壞

舊志三峽澗有石梁

參政余文獻棺材石蓋造橋時所用以緩上流之勢

者也其嶠岬處各有小石支之可見

題志嘉靖壬子正月既望同知南康府事汪伊遊姪學周兒學孔學文侍

樓賢橋東有招隱泉其下有石橋潭

山疏招隱泉在樓賢橋側泉出石龍首中瀉下三峽澗匯為巨潭曰石橋潭陸羽嘗評其水為天下第六舊有陸羽泉亭今廢

石劔石橋潭三大字

唐書陸羽傳陸羽字鴻漸復州竟陵人也不知其所從生有僧得諸水濱畜之既長以易自筮得蹇之漸

曰鴻漸於陸其羽可用為儀因取以為名氏其師嘗教以佛書欲使為僧羽雅不欲僧師怒因使執諸賤役役苦之羽直學記誦不肯事諸鄙事竟苦鞭笞去為優人作談諧數千言太守李齊物見而異之授以書遂廬火門山貌悅陋口吃而辨上元初更隱若溪羽嗜茶著茶經三篇言茶之原之灑之具甚備當是時鬻茶者皆陶羽形置煬突間祀為茶神不售即沃以茶又有常伯熊者因羽論復廣著茶之功時御史大夫李季卿過臨淮召伯熊伯熊執器肴季卿為再舉杯至江南又召羽羽野服挈具而入季卿頗卑厭

之不爲禮後呼左右以錢三十文賞茶博士羽愧之
更著毀茶論然自是天下尚茶成風而回紇乃始驅
馬以市茶云

六帖陸羽更隱苕溪自稱桑苧翁闔門著書或獨行
野中擊木誦詩裴回不得意輒慟哭而歸時謂唐之
接輿西門山齋對壺口之流也
歐陽脩大明寺水記陸羽茶經其論水云山水上江
水次之井水爲下又云山水乳泉石池漫流者上滌
湧湍漱勿食食久令人有頸疾江水取去人遠者井
取汲多者其說止於此未嘗品第天下之水味也張

又新煎茶水記始云劉伯芻謂水之宜茶者有七等
又載羽爲秀卿論水次第有二十種皆與茶經不合
茶經謂山水上乳泉石池爲上江水次而井水下伯
芻以揚子江爲第一惠山石泉第二虎丘石泉第三
丹陽寺井第四揚州大明寺井第五松江第六淮水
第七秀卿所說二十水廬山康王谷水第一無錫惠
山泉第二蘄州蘭溪石下水第三扇子峽蝦蟆口水
第四虎丘寺井水第五廬山招賢寺下方橋潭水第
六揚子江南零水第七洪州西山瀑布第八桐栢淮
源第九廬山龍池山頂水第十丹陽寺井第十一揚

州大明寺井第十二漢江南零水第十三王虛洞香
溪水第十四武關西水第十五松江水第十六天台
十丈瀑布水第十七柳州圓泉第十八嚴陵灘水第
十九雪水第二十如蝦蟆口水西山瀑布天台十丈
瀑布皆戒人勿食食之生疾其餘江水居山水上井
水居江水上皆與茶經相反得非又新妄附益之耶
其言南零岸水事涉怪誕水味有美惡而已欲求天
下之水一一而品第之不亦妄耶羽論水惡渟漫而
喜泉源故非取汲多者江雖長然衆水叢雜故以山
水

餘冬序記張又新煎茶記自述於僧舍得一書見陸
羽與李季卿論水之品二十又言劉伯芻稱水之宜
茶有七等揚子江南零水第一嘗挹而試之誠如其
說及刺朶嘉過桐廬嚴陵瀨家人用水潑陳黑壤茶
皆芳香以前佳茶鮮馥不可名愈於揚子南零殊遠
至朶嘉取僊巖瀑布用之亦不下南零今考又新僧
室所得書水品次第桐廬嚴陵瀨水乃在第十九而
僊巖瀑布弗與焉

幽邃山

樓巒橋西為幽邃山

南康志馮京字當世其先自河朔徙鄂京有奇志因父調南康兵官與兄元隨侍初主歸宗僧惠南善風鑒許以甲科後至幽邃菴愛其幽絕僧仁監留止讀書未幾擢第今幽邃菴古松京手植也

鶴林王露馮京鄂州咸寧人其父商也壯而無子將如京師其妻與白金數笏使買妾及至京師買一妾立券償錢矣問妾所自來但泣而不言固問之乃其父有官綱運欠折鬻女以償也遂惻然遣還不索其錢及歸為其妻具言之妻曰君用心若此何患無嗣居數月妻果有娠及將誕其里中人皆夢鼓吹喧闐

迎狀元至馮第俄而京生家貧甚讀書瀟山僧舍僧有大京與其學者烹食之僧訴之縣縣令命作偷狗賦援筆立成其警聯云餅餌引來喜掉續貂之尾索綯牽去驚回顧兔之頭令擊節歎賞延之上座明年遂作三元有詩號瀟山集皆其未遇時作

山疏幽邃菴南康志不書蓋其廢久矣今附見此山

西源菴

幽邃之前有西源菴

山疏西源菴者宋崔嘉彥所栖隱處也嘉彥西蜀成紀人有用世才紹興中嘗以策干趙忠簡公公是之

會罷相不果用嘉彥遂去隱西源菴朱晦翁在南康
時嘗與往來已而崔卒晦翁又作詩以挽之云菴在
臥龍石佛之間舊志在幽邃菴前

晦翁與崔嘉彥東前日詣見重有喧聒媿不可言奉
告獲審經宿道體佳勝為慰某前日出山至玉京陂
頭遇雨巾履沾濕狼狽可笑喜幸之深但恨已差晚
耳承問之及感感餘俟入城得面布也昨承在顧樓
贖得款餘論為慰卽刻伏惟動止佳勝昨日之雨城
中僅能飲塵高隱必多得之也米資少許別紙送上
幸視上魏甥恪卽向來病甥之兄到此病作自有手簡

求醫藥幸審其證報之當為脩製服餌也昨日裴回
三峽奉候久之旣以莫遂東走楞伽折桂失此一見
深悵想也奉告欣審卽日殘暑道體佳勝菴屋媿仰
勤神用方丈牕牖只於兩旁為之大小隨意可也承
誨示并竹萌良荷厚意知煩親斲尤珍感臥龍亭子
已下手否何說栽竹木處恐意可便令施工也人還
布謝草草復未有一物為報引領雲山第增媿仰承
手示聞還自德安體用冲勝良慰昨夕聞山間頗沾
足城中殊少未敢廢祠也所喻當為立之菴中什噐
俟一面措辦旦夕得雨後須一出郊諸容面道或因

入城幸左顧也奉告承乍寒道體增勝為慰臥龍菴
新主人未得一往視之承其寄笥感感人還草草少
間別奉問次

朱晦翁西源菴記予少好佳山水異甚而自中年以
來卽以病衰不克逞其志於四方獨聞廬阜奇秀甲
天下野人逸士往往徜徉於其間意常欲一往遊焉
而未暇也前年蒙恩試郡在此山之陽乃間以公家
職事得至其中其巖壑幽深水石奇怪固平生所創
見而於巖壑水石之間又得成紀崔君焉乃信前所
聞者之不誣也君名嘉彥字子虛少慷慨有奇志壯

歲避地巴東三峽之間脩神農老子術東下吳越以
耕戰之策干故相趙忠簡公趙公是之會去相不果
行君自是絕跡此山按陳令舉所述圖記得西源菴
故址于臥龍瀑水之東築室居焉耕田種藥僅足以
自給而四方往來之士皆取食焉其疾病老孤無所
與歸之人至者亦收養之蓋年逾七十矣而神明筋
力不少衰予往造之而君不予避也一旦為予道說
平生相與太息會予結屋臥龍以祠諸葛丞相世蓋
少識其意者君獨歎曰此奇事也相為經紀其事以
迄有成兩年之間相見者不知其幾而君未嘗一言及

外事予以是益嘉君之為人而重歎其既老無所復
用於世也淳熙辛丑閏月之晦予既罷郡來宿臥龍
君曰臥龍之役夫子既言之矣顧西源獨未有記復
能為我書之乎予曰諾哉於是悉次其說俾刻焉
晦翁次張彥輔西源之作無處堪投跡空山寄一椽
懸門窺絕壁繚徑上層巔檻闕吞江浪窻虛響谷泉
卅經閑自讀不為學神僊

西澗清淨退菴

樓巖橋西有水為西澗其僧舍曰寶峯菴

山疏西澗在樓巖西三里所

寶峯菴即靜隱院今廢

寶峯之僧月公晦英邵或湛堂準元首座大慧果

寶訓湛堂準每得前賢書必焚香展讀或勒之石既
歿無一金之儲惟唐宋諸賢墨蹟二篋眾為會錢茶
毘之

宗門武庫李商老家於廬山之下與湛堂準往來居

寶峯者數年通攷商老名彭公擇家子弟也東坡山

谷文潛皆與往來頗博覽強記所著有日涉園集然

詩體拘狹少變化

寶峯菴有劉凝之隱居後更築之曰清淨退菴

山疏疑之名渙均州人天曆中舉進士為頴上令介
介不適於俗年四十即掛冠去歸廬山歐陽永叔為
之賦廬山高疑之既歸隱居落星灣嘗乘黃犢往來
廬山中尤愛寶峯西澗之勝數就憇焉寶峯之僧因
結茅以居之遂自稱西澗居士是時屯田員外郎陳
舜俞以言新瀆謫監南康酒稅亦騎牛廬山中與之
往來龍眠李公麟為之繪圖作歌其後朱文公守南
康時即寶峯舊趾立清淨退菴及靜隱亭以表之而
寶峯因更名靜隱院晦翁有清淨退菴詩云

張文潛水玉堂記疑之有詞學為小官數以事屈在

位者節高不能容歸廬山築室種蔬而食之無求於
物人皆師尊焉

歐陽永叔廬山高詩廬山高哉幾千仞兮根盤幾百
里峩然屹立乎長江長江西來走其下是為揚瀾左
蠡兮洪濤巨浪日夕相衝撞雲消風止水鏡淨泊舟
登岸而遠望兮上摩青蒼以晻靄下壓后土之鴻龐
試往造乎其間兮攀緣石磴窺空豁千崖萬壑響松
檜懸崖巨石飛流淙水聲聒聒亂人耳六月飛雪洒
石砧僊翁釋子亦徃徃而逢兮吾嘗惡其學幻而言
死但見丹霞翠壁遠近映樓閣晨鍾暮鼓杳靄羅幡

幢幽花野草不知其名兮風吹霧濕香澗谷時有白
鶴飛來雙幽尋遠去不可極便欲絕世遺紛龐羨君
買田築室老其下插秧成疇兮釀酒盈缸欲令浮嵐
暖翠千萬狀坐臥常對平軒窻君懷磊砢有至寶世
俗不辨珉與玳策名為吏二十載青衫白首困一邦
寵榮聲利不可以苟屈兮自非清泉白石有深趣其
意矧碑何由降丈夫壯節似君少嗟我欲說安得巨
筆如長杠黃山谷跋劉公中剛而外和忍窮如鐵石
其所不顧萬夫不能回其首也家居四十年不談時
事賓客造門必置酒終日其言壘壘似教似諫依於

莊周澤名之開年八十而耳目聰明行

莊周澤名之開年八十而耳目聰明行

莊周澤名之開年八十而耳目聰明行

而名聲此山以不磨滅碌碌而得志願者視公何如

哉此山以不磨滅碌碌而得志願者視公何如

五乳峯臥龍崗胡鼻峯

西澗之西有山鄰於七尖山是為五乳峯

山疏山有五峯如乳故名五乳在七尖山東去西澗

三里

五乳之北為筲箕窩

山疏筲箕窩在龜背峯東下當石佛寺西南四高而中窪如筲箕狀

五乳峯東為臥龍岡其下有臥龍潭

山疏臥龍潭有三潭其二在臥龍崗巔其一在崗下谷中潭水與開先瀑布同源而分流自龜背峯東循筲箕窩逕臥龍岡巔下注谷中之潭而谷中之潭有黃石數丈橫據潭心蜿蜒若龍岡巔之水直下三數十丈奔注之湍激旋洄混漾動搖若欲飛舞故名臥龍

臥龍潭有三數小黃蛇出沒漩水中擊之則迸入石竇

石劄紫陽朱熹卜臥龍山宅成紀崔嘉彥寔缺之其徒臨江劉清之已亥秋七月共二十九字餘不可辨又臥龍隸楷各二大字已上在潭東壁嘉定辛巳秋太守黃桂增啓臥龍祠堂重陽落成率郡寮鄭涇李大器郭津趙汝欣陳巽陳維明茹或趙希价金應孫趙與嶽展拜祠下朱缺奉檄至亦預焉已上在溪口東崖

朱晦翁臥龍潭送水文往分靈液來卽祠壇誠未格

於幽潛澤尚愆於田畝惟時淹久懼弗吉獨敢奉水
壺言歸貝闕別禱餘潤用弭炎氛尚神聽之淵冲鑿
惟衷而饗畧

山疏李夢陽記言臥龍潭嵐重不可居晝日嘗黯黯
予嘗至其下觀之不然豈李之遊也適陰霾嵐重而
李遂以為常耶

臥龍之水東行出硤與清泉澗水合

有菴於潭東為臥龍菴

龜山文集廬山臥龍菴有劉道人自云百餘歲碧眼
不粒食惟食栢飲水每客至必先知之欲往見不果

楊龜山南康值雨時臥龍菴前碧眼翁日飲山淥餐
溪松神融氣合入荒外此心炯炯宜先通未須勤移
却俗駕會應一洗塵凡空寄言歸侍壺丘子他日來
游當御風

山疏菴在臥龍潭東數百步劉死菴廢其後朱子守
南康復建菴而繪諸葛武侯像於其中又別於潭傍
立亭曰起亭又亭於菴之傍曰脩白亭欲俟解組居
之會遷官去南康不果居今竝廢我一明嘉靖中都
御史何遷復就潭北建起亭而刻出師表及晦翁諸
詩於石

石劖嘉定七年臨川吳清之與崔嘉彥同遊此

題志嘉靖庚申八月三日偕劉政選仁山白鹿洞主
萬伯行貢玄畧遊字功字度中孚侍蓋余填撫得代
將赴淮陽之明日也吉陽何遷書

朱文公臥龍菴記臥龍菴在廬山之陽五乳峯下予
自少讀龜山先生揚公詩見其記臥龍劉君隱居辟
穀木食澗飲蓋已度百歲而神清眼碧客至輒先知
之則固已知有是菴矣去歲蒙恩來此又得陳舜俞
令舉廬山記讀之其言曰凡廬山之所以著於天下
者蓋有開先之瀑布見於徐凝李白之詩康王之水

簾見於陸羽之茶經至於幽溪險絕皆有水石之美
也此菴之西蒼崖四立怒瀑中瀉大壑淵深凜然可
畏有黃石數丈隱映連屬在激浪中視者眩轉若欲
蜿蜒飛舞故名臥龍此山水之特勝處也於是又知
其泉石之勝乃如此間以行田始得至焉則菴旣無
有而劉君亦不可復見獨泉石之勝不可得改然其
壯偉奇特之勢則有非陳記所能彷彿者余旣憺其
出於荒堙廢壞之餘而又幸其溪阻夙絕非車塵馬
跡之所能到儻可得擅而有也時以上章乞解郡紱
乃捐俸錢十萬屬西源隱者崔君嘉彥因其舊址縛

屋數椽以俟命下而徙居焉既又緣名潭之義畫漢丞相諸葛公之像真之堂中而故友張敬夫嘗爲賦詩以紀其事然菴距潭猶數百步步亂石間三涉澗水乃至至又無所託足以寓瞻眺乃顛沛而反因相其東崖鑿石爲磴而攀緣以度稍下乃得巨石橫出澗中仰翳喬木俯瞰清流前對飛瀑最爲谷中勝處遂復作亭於其上旣以爲吏民禱賽之地而凡來遊者亦得以彷徨徙倚而縱目快心焉於是歲適大侵因榜之曰起亭以爲龍之淵臥者可以起而天行矣然予前日之請迄今蓋已屢上而竟未有得也歲月飄忽念之慨然乃叙其作與本末而書之屋壁來者讀之尚有以識予之意也

朱晦翁詩空山龍臥處蒼峭神所鑿下有寒潭幽上有明河落我來愛佳名卜築尋幽壑永念千載人丹心豈今昨英姿儼繪事凜若九原作寒藻薦芳馨飛泉奉明酌公來識此意顧少慘不樂抱膝一長吟神交付冥漠又次張彥輔臥龍之作瀑水源何處高疑雲漢通瀉時垂練直落處古潭空客寄詩能好龍蟠意自誰知君來峴首爲我說隆中

李夢陽詩出遊青天礪遂至臥龍潭重岑上無極白

日蔽寒嵐嶢峭詎能少險絕誰可探歷石誠巍偃捫
壑驚訝給我行值穠季霜藟搖匡南午攀日忽夕足
倦情逾酣雷瀑響岩澗孤花媚澄涵撫似悟命意循
迹想名菴菴廢人踪絕岩剝文半滅世坦異道塞慨
茲焉能說

何遷臥龍潭觀泉詩尋山須到巔尋水須到源坐着
泉落處欲問已忘言

參議孫應鰲詩王峽飛雄瀑潏潭久臥龍年年長未
起可有五花供

臥龍之側有僧舍曰五乳院觀音菴

南康志五乳院在臥龍菴側朱晦翁蓋嘗遊焉後兵

燬

晦翁題志淳熙庚子重五日晦翁與程正思陳彥忠
俞季清來翁子在甥魏愉從

舊志觀音菴在五乳院前菴有觀音井今不知所在
五乳峯西南為胡鼻峯

山疏胡鼻峯峯形如胡鼻在七尖山東南南康舊志
在鶴鳴峯東

桑喬生曰漢陽五老欲合不合合鄱乃見其山水與上霄
鄰峻級危磴下臨無地行者孑孑然出入雲霧間喘

不聯屬也。巉削壁立數百千仞，軒軒然如人箕踞而
窺重湖。又如五雲翩然欲飛，湖山煙水微茫映帶東
南州郡數百千里，軒豁呈露可指顧而盡。中更嶽嶽
李太白予行天下所游覽山水甚富，俊偉詭特鮮有
能過之者，真天下之壯觀也。宋文公遊廬阜五老峯諸山題志晦翁與程正思丁
復之黃直卿俱來覽觀江山之勝樂之忘歸，肯淳熙
己亥重午日翁子在甥魏恪侍行。

李太白五老峯詩廬山東南五老峯，青天削出金芙蓉。
九江秀色可攬結，吾將此地巢雲松。

吳筠廬山五老峯詩彭蠡隱溪翠滄波，照芙蓉日初
金光滿。景落黛色濃，雲外聽猿鳥。煙中見杉松，自然
符幽情。蕭洒愜所從，整策務探討。嬉遊任從容，玉膏
正滴瀝。瑤草多丰茸，羽人栖層崖。道合乃一逢，揮手
欲輕舉。爲余扣瓊鐘，空香清人心。正氣信有宗，末用
謝物累。吾將乘鸞龍。

明參議孫應鰲五老峯詩五老重相見，真如遇所親。
獨看青眼在，共作白頭新。

同知陳守義泊舟鄱湖望五老峯詩湖上風清寄一
航，雲巢松壑來客狂。嘯倚乾坤招五老，閒看鷗鷺沈

流光高臥不見黔妻子曠懷且進崑崙觴
鳥語下舟人喚起夜未央

五老峯下有李太白書堂

圖經太白情尚卓逸不爲時羈仕旣不得志益肆意
山水間見五老峯而奇之遂卜築焉它日將歸中原
猶戀戀不忍去指山而矢之日期君再會不敢寒盟
丹崖翠壑尚其鑒之

太白年譜天寶十四載乙未安祿山反明年明皇在
蜀詔永王璘節度東南璘舉兵反白時臥廬山璘脅
致之已而璘軍敗丹陽白奔亡至宿松山坐繫潯陽

獄宣慰大使崔渙御史中丞宋若思驗治白以爲罪
薄宜貸宋表薦云前翰林供奉李白年五十有七爲
璘脅行中道奔走卽已陳晉經渙及臣推覆審實無
辜白有經濟之才請拜京官獻可替否以先朝列不
報乾元二年己亥猶以璘事長流夜郎半道承恩放

還

楊衡隱居

唐詩紀事楊衡者元和中詩人嘗居廬山人有竊衡
詩而登第者其後衡及第見其人怒曰一一鶴聲飛
上天之句尚在耶其人遜謝曰此句知兄甚愒不敢

竊之衡莞爾曰猶可恕也

隱居今不知處

符載隱居

山疏符載者蜀人也與楊衡並善為詩借隱五老峯下隱居今不知處

晁氏曰符載字厚之岐襄人幼有宏達之志隱居廬山聚書萬卷不為章句學貞元中李異觀察江西薦其才授奉禮郎為南昌軍副使繼辟西川韋臯掌書記澤潞郗士美參謀歷協律郎監察御史元和中卒段文昌為墓志其集皆雜文末篇有數詩而已集前有崔群上湘送符處士歸觀序皆云載蜀人以比司

馬王揚云

崔群送符載還蜀省觀序旄頭光明垂三十載不習

俎豆化為侯王者有八九焉隱逸憔悴羔鴈不行蒼

山沈沈側陋不顯建中初有峨嵋客符君發六籍掉

三湘潑入庄廬絕迹半紀學窺顏子之門闕文紹陳

君之骨鯁逸慕嚴光之垂釣志效管寧之不欺結廬

熙熙人不知其然也頃予奉命江西三年徃復彭蠡

未嘗不詠湖月漱天倪造符君雲扃宿五老峯下動

更晦朔不理還權偶丹霄至人白鶴羽客牽靈芝躡

天壇相顧永息乎蓬瀛豈復又縈於塵網覩君超澹

愴興舊遊雖笑語飲會如常終忽忽若居大夢君家
在岷蜀展愛高堂將聖賢典籍充人子幣帛斯所以
激衰俗扇清風方伯地君不以厚禮遲吾子予未之
信秋九月楚人歌採蘭以送之

唐詩紀事載字載之有奇才始與楊衡宋濟習業青
城山衡擢第濟老死無成唯載以王霸自許耻於常
調韋臯鎮蜀辟為支使雖被知遇然尚偃蹇臯嘗於
二十四化設醮請撰齋詞載時飲摩訶池離席盥漱
命小吏十二人捧硯人分兩題緩步池上口占授之
其敏速如此時劉闢為金吾倉曹參軍載贊其真曰

矯矯化初氣傑文雄靈螭出水秋鷄乘風行義則固
輔仁乃通他年良覲麟閣之中及臯卒闢摠留務載
亦在幕中闢敗載素服請罪高宗文以贊有行義輔
仁之語禮而釋之

柳宗元上江陵趙宗儒落伏聞以武都符載為記室
天下之士雜然相顧繼以歎息夫以符君之藝術志
氣為時聞人才位未會盤桓固久中間因緣陷在危
邦與時偃仰不廢其道而為見忌嫉者橫致唇吻房
給事以高節特立明之於朝王叟部以清議自任辨
之於外然猶小人浮議困在交戟凡諸侯之欲得符

君者城聯壤接而惑於騰沸環視相讓莫敢先舉及
受署之日則皆開口垂臂悵望悼悔譬之求珠於海
而徑寸先得則衆皆快然罷去知奇寶之有所歸也
雲溪友議于頓鎮襄陽載致書乞買山錢頓與之錢
百萬一士有釋道之室曰大明觀吉祥寺頭陀寺芝山寺

唐姚係五老峯大明觀贈隱者詩雲觀此山北與君
攜手稀林端沙橫水洞口入斜暉乍見鸞鶴邇忽爲
煙霧飛故人清和客嘿會琴心微丹術幸可授青龍
當未歸悠悠平生意此日復相違

楊衡宿吉祥寺寄隱者詩風鳴雲外鐘鶴宿千年松
相思杳不見月出山重重

李涉再遊頭陀寺詩無因慙泊魯陽戈白髮兼愁日
日多只恐雪晴花便盡數來山寺亦無他已上寺觀
竝廢

今獅子峯金印峯旛竿峯凌雲峯折柱寺

五老峯前有峯嵯峨是爲獅子峯

舊志獅子峯在五老峯南亦謂之獅子崖

星壑崖在獅子峯前崖有洞可通人行自下望之如
星俗謂之橋崖

南康志竹林院在獅子崖下相傳卽有影無形聖僧
隱焉者也

獅子峯前有石如印為金印峯其下有李庭筠書堂

正支南康志金印峯去縣北三十里舊志在五老峯下山

疏今無復有知此峯者

李庭筠不知何許人舊志庭筠嘗舉進士仕為四門

博士書堂雙石出雲飛瀑在下亦佳境也今廢

舊志五代李徵古復卽書堂遺趾讀書舉進士仕南

唐為樞密副使出判洪州復過書堂召賓客置酒樂

飲作記勒石乃去後亦燬山疏徵古事見通鑑綱目

獅子峯南下為旛竿峯凌雲峯

舊志旛竿峯在折桂寺後其下有水曰旛竿源山疏

旛竿峯三石也高丈許亭亭立如旛竿其上有大磐

石可坐數十人有泉出於石下逕旛竿峯下流過折

桂寺名旛竿源

舊志凌雲峯上隱碧空下吞湖江其下有白龜池白

龜潭

山疏凌雲峯舊志凡再書今人無復知者依志且載

或曰卽白龜山

凌雲峯下有折桂寺李逢吉書堂遺趾也寺後有讀書臺

舊志李逢吉書堂在凌雲峯下黃雲觀東新志逢吉嘗讀書於此已而舉進士故寺名折桂

梅溪集有僧年八十一言廬山諸寺惟折桂楞伽不被焚燬

山疏書堂為寺事亦久遠然新舊二志俱不詳其沿革逢吉事具唐書本傳

石劄晦翁通史送張襄陽至此痛飲而別又嘉定戊寅七夕前一日長樂黃喻潘相循江湖泳雲門高九萬甫田陳必方信孺方子槐方長孺臨川缺鹿鄉南昌宋恭信孺子左鉞來遊又元統乙亥三月邑令番

缺李采能警曹筠姚肯堂同遊黃雲之觀又嘉靖九年九月廿九日閩劉世揚題識同遊郡博張金龔綽庠生余士驥戴拱

折桂之上有黃雲觀

山疏黃雲觀在獅子峯麓大石崖下今廢

朱文公折桂院行記始予至折桂院之西軒愛其江山之勝道人雲公為予言此未足觀少上當益奇因導予行溪竹中缺缺缺大阜背負五老面直江湖東西數百里雲山煙水渺茫縈帶奇絕不可名狀乃規作亭其處取李翰林廬山謠中語命以為黃雲觀會

雲公去不果為今年春乃克為之未訖工而余代去
閏月晦日與清江劉子澄長樂林擇之開封趙子明
溫陵許景陽建安王春卿長樂余古之陳彥忠臨淮
張致遠長樂黃直卿俱來因記其事雲公諸王孫弃
官學浮圖灤今客大洪山云淳熙八年辛丑歲朱熹
仲晦父題
折桂之水東南流出白鹿洞

團山硃砂峯行龜峯石船峯木瓜岩凌霄峯凌
霄岩凌霄院

獅子峯西南為團山山東有雙雞峯滴水岩

山疏團山澗在團山東澗東有石如龜澗西有二石
如雞勢且啄龜名雙雞峯

滴水崖在團山澗西崖皆穹窿如岩有泉百餘滴點
滴而下不絕如雨狀陰則勤晴則緩

團山澗水西南流出太平寺

團山之西南為硃砂峯又西南為行龜峯

山疏硃砂峯相傳其下舊出硃砂或曰峯有赤石如

硃砂云王十朋張孝祥俱有詩

黃石港之水循硃砂峯背西南流與諸水會

團山東南稍下有石船峯

山疏石船峯其兩舷皆裂隆人曰雷擊之也然二志俱不載

石船峯西南為木瓜崖

山疏木瓜崖即道士劉混成入山種木瓜為食處也

崖有穴如室可居故亦名木瓜岩

木瓜崖南下為凌霄峯凌霄岩

舊志凌霄峯巉巖萬狀上插層霄上有味真洞蔡尋

真李騰空常飛符煉丹於此

真僊通鑑咏真洞在九疊屏南五老峯東

山疏今疊屏南五老峯東有二尖峯然人不謂之凌

霄今所謂凌霄乃在五老峯西然勢卑不稱其名不知何也

其下有凌霄院

南康志凌霄院又名明真院去府西北二十五里唐

僧道乙建

凌霄峯水其一西行與犀牛塘水會其一西行出太平寺

與太平澗會其一西南行出白鶴觀

犀牛塘青牛谷

凌霄岩西南有犀牛塘

山疏犀牛塘有上下兩塘其水西南流逕白鶴觀背

東會折桂之水出白鹿洞其水西南流經白鹿潭
犀牛塘北為青牛谷

一統志青牛谷在五老峯下

舊志在凌霄峯下道士洪志乘青牛得道處也谷內

有淨妙院谷南有雲臺菴並廢南康志宋道士洪志

通經史善布算遇異人授六甲蕩魔祛疾之術隱居

廬山常乘青牛故稱

山疏青牛谷在犀牛塘北唐時已有此名疑不始於

洪志云

唐楊衡詩隨雲步入青牛谷青牛道士留我宿可憐

夜靜月明中惟有壇邊一枝竹

大明曾榮詩雞鳴函谷海天曙紫氣東來度關去青牛

遺迹今尚存乃在匡廬最深處遙知種玉罷耕鋤萬

里遠駕僊人車關門令尹今安在五千道德今何如

谷口年年春草碧草上空餘舊行迹怪底猶疑敲鯨

眠一片寒雲墮青壁

谷有鄭元素隱居

山疏鄭元素者溫韜之甥也朱梁時韜盜發昭陵石

函鐵匣中所得前代圖書及二王真蹟甚富其後韜

殛死元素盡得其圖書真蹟避禍南徙隱居廬山青

牛谷四十餘年所積書千餘卷卒隱居今廢

太平寺白鶴觀

凌霄岩西南有太平寺

南康志太平寺亦名臥龍菴在團山南宋僧高峯建

正統中僧行全脩

山疏虎石在太平寺前

舊志白石臺在太平寺西今不存白石臺菴今廢

太平澗水圍山澗水西南流逕行龜峯與桃林諸水合

太平寺東南其地曰王楊坂

山疏王楊二姓所居若朱陳村然或謂之黃楊坂

王楊坂水逕金鐘堰芋頭壠入神林湖

有道子室曰白鶴觀

山疏白鶴觀者唐道士劉混成之居也事具虞集記

中觀有混成煉丹井搗藥臼觀北即犀牛塘

陳舜俞廬山記廬山峯巒之奇秀岩穴之深邃林泉

之美茂為江南第一此觀復為廬山第一

元虞集白鶴觀記白鶴觀者唐開元道士劉混成故

居有丹井藥臼及手種杉猶存杉本大徑丈餘然歲

久中空上折孫枝附生其間亦數十圍矣東坡先生

嘗獨遊聞碁聲於古松流水間此其處也初唐高宗

以老子降詔天下皆建白鶴觀九江之觀在德化之
白鶴鄉景隆中文詔天下建景隆觀又建隆興觀郡
卽白鶴易名以應詔復遷今觀於山陽宋太中祥符
中改名承天觀然後人仍名之曰白鶴舊名古栢壇
者也後分九江置南康故今隸南康云劉混成者名
玄和其先彭城人後遷都昌五穆里劉氏其族也居
白鶴久之留其弟子何子玉守舍自入五峯石室種
木瓜爲食煉丹成年八十六別其弟子范僊舟而逝
舉棺將窆空廡有矣人或從之祈禱往往有奇應者
予行山中見山中奇勝思古之所謂弘衍博大真人
者庶或見之然而遊涉日淺塵累積深莫得承風於
萬一乃徒見古人隱者與縉紳先生之遺跡於木石
間千古之慨豈獨其私哉

唐包佶贈廬山白鶴觀劉尊師詩蒼蒼五老霧中壇
杳杳三山洞裏官手護崑崙象牙簡心推霹靂棗枝
盤春從雪粉加毫潤晚漱瓊漿水齒寒慚恨流年筋
力少欲辭露冕事星冠

韋應物寄黃劉二尊師詩廬山兩道士各在一峯居
矯掌白雲表晞髮陽和初清夜降真侶焚香滿空虛
一作 中有無爲藥自然與世疎道尊不可屈符守豈
廬

暇餘高齋遙致敬願示一編書其尊不可區於中豈
宋蘇軾白鶴觀詩并序司空表聖自論其詩得味外
味碁聲花院靜幡影石幢高之句為尤善余嘗獨遊
五老峯白鶴觀松陰滿地不見一人惟聞碁聲然後
知此句之工又曰余素不解碁因遊廬山白鶴觀觀
中人皆闔門書寢獨聞碁聲於古松流水之間意欣
然喜之自爾欲學終不解也兒子過乃麤能之儋守
張允中日從之戲余亦偶坐竟日不為厭也詩曰五
老峯前白鶴遺址長松蔭庭風日清美我時獨遊不
逢一士誰歟棋者戶外屨二不聞人聲時聞落子紋

枰對坐誰究此理空鈎意鈎豈在魴鯉小兒近
啄信指勝固欣然敗亦可喜優哉游哉聊復爾耳

元虞集白鶴觀詩白鶴山人如鶴白自抱山樽留過
客要看脩竹萬琅玕更對名花皆雪色山樽本出山
下泉過客醉去山人眠客亦是鶴君莫笑重來更待
三千年三月一日清城山道士虞集伯生同臨川江
朝宗鄱陽朱景實潁川陳昇可彭城張允道遊白鶴
笑鶴翁見客至欣然自攜一樽與客至竹下看牡丹
花曰今日獨開一朵當是為客發也故為賦此

白鶴之水東南行與折桂之水會

李家山羅漢嶺

白鶴觀東南為白鹿洞

山疏白鹿洞書院事具後七卷中

白鹿洞東北為李家山

山疏李家山者李公擇之居也今不知其址所在

寒泉亭在李家山麓官道傍

白鹿洞南數里為羅漢嶺

山疏羅漢嶺去府城十里所

羅漢寺創於宋廣濟堅禪師紀遊集廣濟以道行得

遇真廟寺成享聖皇后夢十八應真乞歸廬山已而

高麗來貢佛及羅漢金像詔就寺安置因賜額并藏

經土田瑪瑙琴象皮鼓陳舜俞廬山記誰刻千年不

死之枯桐骨以三犧欲牲之雙草

寺後有觀音塔觀音泉

烏龜石在寺前橋下南康志石龜尾日出鹽四兩以

給寺僧炊人少之夜鑿其口而廣之鹽遂不出

羅漢之僧曰系南禪師行林禪師

有鄭元素書堂

山疏書堂在羅漢寺東南廢雲臺菴其遺址也

其水曰雲臺源

其木曰雲朱家山顏家山向家山

白鶴觀西為朱家山其寺東南為雲臺審其貴也

南康志朱家山在府北十里宋朱弼之居也山疏在

棲賢橋東

朱家山水出王楊坂

朱家山東南為顏家山其上有馮孝女墓

南康新志顏家山在府北五里相傳顏魯公嘗居之

舊志與王京山接其下有顏家橋

舊志孝女名素貞嘗割股以療父病郡守陸德輿大

書以表其墓

顏家山側為向家山

南康志向家山在縣西北五里林巒溪秀南與府治

連宋縣令向沈嘗遊

南康府

向家山東南濱湖為南康府

山疏南康府後倚峻山前距重湖號稱險固然山麓

也雖郡城中亦多磴道坡陀參差車馬馳驟之途罕

矣

王禕六老堂記五老之支散為群岡蜿蜒南行距彭

蠡而止中一岡獨稍後南康郡治在焉

陳篆南康軍治記民淳事簡號江東道院

宋史陳瓘字瑩中號了齋閩之南劍人也剛正敢言建中靖國初為右正言權給事中以事出知泰州徙合浦歸四明天徙通州特勒停送台州羈管宣和中華始得以管勾太平宮去寓南康山疏陳了翁往來廬山南北吟諷自適嘗有墨帖與隨緣居士黃榮晉陵尤褒得之朱晦翁為勒石白鹿洞其後了翁以宣和四年卒於楚州今祀白鹿洞

南康志王禕蚤事顯西太祖丙午七月除南康府同知特賜金帶在任有善政多所建明後召還傳信錄

學士王文忠公禕字子充義烏人文章宏麗沈雄自成一家初太祖征江西公進平江西頌上

覽而喜曰吾固知浙東有二儒卿與宋濂耳學問之博鄉不如濂才思之雄濂不如卿除待禮即禮制多所裁定除起居注詔脩元史以禕及宋濂同為總裁一日在史局渴甚謂宋公曰得作上所賜梨漿吾渴濟矣中官竊聞之言于上即命齋賜之洪

武五年以雲南梁王拒險弗宥詔公招諭為所執不屈死所著有華川集續東華大事記

郡有玄妙觀谷巖洞

南康志 玄妙觀在府治西初宋祥符間舛天慶觀於
谷岩洞元改今名洪武中道士周汝鎮重建觀有道
紀司

谷岩洞在玄妙觀內舊志兩山相翼重岡複嶺竝澗
而行宛若洞府

水玉澗

郡城之東爲水玉澗其上有劉凝之隱居

山疏隱居今廢凝之事具清淨退菴類中凝之子恕
格恕子義仲和仲

宋叟恕字道原幼穎悟一日輒成誦八歲時客有言

孔子無兄弟者卽應聲曰以其兄之子妻之座客大
驚異未冠舉進士詔能講經義者別奏名應詔者纔
數十人恕以禮記春秋對凡二十問皆先列注疏及
諸儒異說後決以己意擢第一它文亦高等而廷試
不中更下國子試講經復第一賜第調鉅鹿主簿和
川令恕爲人重義氣急然諾精史學自太叟公所記
下逮顯德事無鉅微貫穿融液如指諸掌司馬光脩
資治通鑑薦恕爲局僚凡史事焚冗難析理者悉委
恕魏晉以後所考論尤精核王安石欲引寘三司條
例辭以親老求監南康軍酒稅就養許卽官脩書後

至西京與司馬光居數月歸道病風孿手足廢然猶時時脩書頃之卒年四十七恕之學自律數地理宦職族姓至前代公府案牘皆取以審證其求書不遠百里徃就讀且錄之忘寢食著五代十國紀年以擬十六國春秋又採太古以來至周威烈時事左氏傳史記所不載者爲通鑑外紀

張文潛水滸堂記道原廉介剛直仕必欲達其道不以一毫挫於人方其激於義而作雖足蹈坎井手攬虎兕視之若無卽古烈士或愧焉平居自負經濟大畧其爲吏嚴簿書束胥吏撫解寡繩豪猾纖悉曲當

皆可爲後灑其學自書契以來至於今國家治亂君臣世系廣至於郡國山川之名物詳至於歲月日時之後先問焉必知考焉必信有疑焉必決其言滔滔汨汨如道其里閭室堂事其著書有疑年譜年畧譜通鑑外紀十國紀年惟十國紀年先成世傳之以比遷固歆向公亦自以爲不愧云

捫蝨新話劄道原能自攻其過云平生二十失佻易辨急遇事輒發狷介剛直忿不思難說古非今不達時變疑滯少斷勞而無功妄自標致擬倫勝已疾惡太甚不恤怨怒事上方簡遇下苛察直語自信不遠

嫌疑執守小節堅確不移求備於人不恤咎怨多言
不中節高談無畔岸臧否品藻不揜人過惡立事不
隨衆好更革應事不揣已度德過望無紀交淺言深
戲謔不知止任事不避禍議論多譏刺論事無機械
行止無規矩人不忤已而隨衆毀譽事非大害而憂
患太過以君子行義責望小人又十八蔽言大而智
小好謀而疎闊劇談而不辨慎密而漏言尚風義而
齷齪樂善而不能行與人和而好異議不畏強禦而
無勇不貪權利而好躁進儉嗇而徒費欲速而遲鈍
識闇而強料事非濃家而深刻樂放縱而拘小禮樂

易而多憂畏動而惡靜多思而處事乖忤多疑而數
爲人所欺

事文類聚劉秘承家極貧一芥不妄取自洛陽歸時
方冬無禦寒具溫公以一二衣襪及貂褥贐不受強
之乃受至潁川悉封還

十國紀年序劉道原不信浮屠說以爲如人居逆旅
一物不可乏去則盡棄之豈得齎以自隨哉

舊志道原先凝之數年卒葬凝之墓側後其子義仲
遷其墓於德化

米玉堂記蘇子由嘗見凝之出而歎曰凜乎非今世

之士也凝之之爲父與道原之爲子廉潔不撓水清而玉剛鄉人因名其堂曰冰玉堂澗曰冰玉澗

舊志格字道純學博論正得父兄餘緒起應制科黃山谷陳令舉有詩送之未仕而卒

宋叟義仲字壯輿於書無所不讀不妄取與恕卒之七年資治通鑑成追錄其勞官義仲郊社齋郎政和中編逸叟義仲自汝州儀曹召爲編脩官至京師不謁權要未幾卽致仕歸廬山一時公卿賦詩郊餞三世繼美尤不易及云魏了翁書遂初堂書目後廬山劉壯輿號稱多書然未久輒失之

宋叟和仲有軼材作詩清奧刻厲欲自成家爲文慕石介亦蚤死

朱晦翁冰玉堂記南康使君曾侯致虛旣表屯田劉公之墓明年乃訪得其故居遺地於郡治之東暇日屏騶馭披荆棘而往觀焉問其北隱然以高者則劉公所賦之東臺也顧其南窅然以下者則詩序所指之蓮池也蓋自兵亂以來蕪廢日久唯是僅存其他則皆漫滅不可復識矣曾侯爲之躊躇四顧喟然歎曰凝之之爲父道原之爲子其高懷勁節有如歐馬蘇黃諸公之所道是亦可謂一世之人豪矣想其平

日居此林塘館宇之邃詩書圖史之盛既有以自適
其適而一時遊且宦於此邦者亦得以叩門避席而
考德問業焉何其盛也顧今百年之外臺傾沼平鞠
爲灌莽樵兒牧子皆得以嘯歌躑躅於其上又何其
可悲也雖然此吾事也不可以不勉乃出少府羨錢
贖之民間垣而溝之以合於郡圃壘石以崇其臺引
流以沃其池作米王之堂於臺之西北繪劉公父子
之像於其上且聞陳忠肅公之嘗館于是也則又繪
其像以侑焉旣而所謂是是堂漫浪閣者亦以次舉
皆復其舊旣成使人以圖及書來屬予記予惟異時

承乏此邦亦嘗有意於斯而不克就今披圖考駿尚
能憶其髣髴固喜曾侯之敏於事而能有成矣抑予
又有感焉近歲以來人心不正保身者以同流合污
爲至行任事者以便秘適已爲長策其聞劉氏父子
之風不唾而罵之者幾希矣欲其能如曾侯一以表
賢善俗爲心而不奪於世豈可得哉於是旣書其事
而適有以陳令舉騎牛詩爲寄者因并以邊曾侯請
刻之堂上以補一時故事之缺云

黃山谷過致政屯田劉公隱居詩兒時拜公牀眼碧
眉紫煙舍前架茅茨爐香坐僧禪女奴煮粟石盆

馮機泉今來掃門巷竹間翁蛻蟬堂堂列五老勝氣
失江山石盆爛黃土茅齋新壞椽女奴為民妻又瘞
高里園當年笑語地華屋轉朱欄課兒種松子傘蓋
上參天投策數去日木行天再環先生古人風鐵膽
石肺肝眼前不可意壯日掛其冠解衣盧君峯洗耳
瀑布源霧豹藏文章驚世時一班眾人初易之久遠
乃見難憶管子政在為翁數解顏五兵森武庫河漢
落舌端玉陽已富饗塵冠不肯彈呻吟刊十史凡例
墨新乾宰木忽拱把相望風隧寒百楹書萬卷少子
似翁賢

後山少府嶺劉凝之墓

南康郡西負郭為後山

南康志後山在星子縣西一里所與前山對峙

其下有陳圓隱居

南康志陳圓字德方嘗應制科有名稱已而歸隱後

山後進多師之黃山谷贈詩曰城中咫尺雲橫棧獨

立前山望後山又題其堂曰獨善隱居今廢

陳慕寓居

南康志陳慕字必正少從陳瑩中劉壯輿蘇養直遊

廉靖有守舉進士歷任州縣有聲或勸使求郡不從

歷倅洪潭明三郡歸以祖業遜兄寄寓後山號星灣
山疏慕子準正臣以父廕補官年五十卽掛冠歸號
刺慕清隱準子秬成和仕為楚州倅秬子畦子從為南漳
尉調靖州推官魏了翁奇而薦之不就以通直郎致
仕三世皆盛年納祿云
又西為少府嶺其上有劉凝之墓

山疏少府嶺在南康府西二里所以劉墓得名

劉凝之墓在少府嶺凝之晚善養性術年八十五無
疾沐浴正冠而卒葬嶺下朱晦翁為守時嘗脩其墓
為立壯節亭後廢我明正德中南康守陳霖重建

墓亭立石刻歐詩及朱記

宋晦翁壯節亭記淳熙己亥歲予假守南康始至訪
宋先賢遺蹟得故尚書屯田員外郎劉公凝之之墓
於城西門外草棘中予惟劉公清名高節著於當時
聞于後世暫而挹其餘風者猶足以激悞而律貪頽
今不幸饋奠無主而其丘墓之寄於此邦者又如此
是亦長民者之責也乃為作小亭於其前立門牆謹
扃鑰以隄樵牧歲以仲春率郡吏諸生祀焉郡之詩
人叟驩請用歐陽公語名其亭以壯節適有會於予
言因屬友人黃銖大書以揭焉自是以來東西行而

過是者莫不顧瞻起敬予亦自以為茲丘之固且安
可以久而不壞矣紹熙辛亥予去郡甫十年今太守
章貢曾侯寔來按圖以索其故則門牆亭榜皆已無
復存者為之喟然太息即日更作門牆築亭其間益
為高厚宏闊以支末久又礮巨石以培其封植名木
以廣其籟求得舊榜復置亭上歲皆奉祀一如舊章
且割公田十畝畀傍近能仁寺僧使專奉守增葺費
而又以予嘗經於此也以書來曰願得一言以記之
使後之人知吾二人拳拳之意而不懈其尊賢尚德之
心也斯不亦有補於世教之萬分乎予曰諾哉曾侯

名集字致虛學有家灋故其為政知所先後如此云
又西為層城山玉京山清潭山去今半里陶淵明遊斜川詩亭辛丑正月五日天氣澄和風物

又西為層城山

舊志層城山今謂之烏石山在縣西五里

陶淵明遊斜川詩亭辛丑正月五日天氣澄和風物

間美與二三鄰曲同遊斜川臨長流望層城又云若

夫層城傍無依接獨秀中泉遙想靈山有愛佳名

南康志九洪橋在縣西六里橋通錦屏鋪永樂二年

知縣唐冕重建

又西為玉京山

又西 南康志 王京山在南康府西七里

王澗在王京山東南有橋曰王澗橋朱晦翁有王澗

詩 東志 大邑餘五里餘 東志 餘五里餘 東志 餘五里餘

山疏 山當太湖濱一峯蒼秀彭蠡東西數百里雲山

煙水浩渺縈帶皆列几席前奇絕不可名狀又云

或曰姚氏女王京死而葬此故名然小說媼女姚王

京嫁襄州小吏衛敬瑜敬瑜溺水死王京守志不它

又西 適時有孤燕棲梁間王京試以紅縷繫其足明年春

燕復來王京賦詩曰答時無偶去今年還獨歸故人

恩義重不忍更雙飛已而王京死燕飛至墳所亦死

唐李公佐有燕女記而南史以為王整之姊然皆云

襄城人非此山事

其下有陶淵明舊居

山疏 王京山陶淵明嘗居之淵明詩疇答家上京註

云南康志近城五里地名上京有淵明故居

崔誠老隱居

山疏 宋崔誠老名閑博學高逸不事進取廬於王澗

之上以琴自娛名其廬曰睡足菴而自號曰王澗道

人菴今廢

蘇東坡序 答醉翁喜瑯琊山水之勝其後沈遵以琴

寫其聲而無詞今王澗道人獨妙於琴故因其聲而辭以補之

王京之側有清潭山

南康志清潭山在縣西七里與王京山相聯屬山下有古潭

前山張叔夜墓

郡城東南負郭為前山其下有馮去疾別墅

南康志前山在縣東南一里所

舊志去疾嘉定十三年劉涓榜進士知溫州

郡城之東有神掌石

南康志神掌石在縣東一里陶公祠前

山疏石方而黑文隱隱如人掌俗謂之神運石

又東有張叔夜墓

山疏張叔夜墓在南康府城東三里

宋史初叔夜知海州嘗降劇賊宋江後知鄧州欽宗

時分天下二十三路為四道道置都總管以領之而

叔夜為南道都總管與其子伯奮仲熊帥師勤王進

簽書樞密院後卒於北溝河歸葬南康贈開府儀同

三司諡忠確

舊志郡守哀從脩嘗表其墓以冰玉諸賢合祀

宮亭湖

又東為宮亭湖

南康志宮亭湖在縣東五里

湖以宮亭名者水經註爾雅云大山曰宮宮之為名

蓋起於此不必一由三宮也

湖傍之山有石鏡

幽明錄宮亭湖傍山間有石數枚形圓如鏡明可以

鑒謂之石鏡後人以火燎之石遂不明

水經註山東有石鏡照水之所出有一圓石懸崖明

淨照見人形晨光初曜則延耀入石毫細必察故名

石鏡

湖上有宮亭廟

山疏宮亭廟高僧傳南康志謂之却亭廟宋景德間

敕著祀典

周景式廬山記高僧傳宮亭廟著靈孫權時其神能

分風送舟舟行者皆禱祀祈風施捨山積西域僧安

世高者南遊過祠下神忽人語為高言其甫世嘗為

僧以曠志故積業受報墮異類中良苦今且死欲高

為立灑營塔覲得善生高曰見而形神曰形惡必駭

眾不可見已而自座後出其首蓋大蟻也首與高膝

齊高撫其首為梵語讚頌數四蟒悲淚如雨即隱去
無何苑柴桑縣山壑中其長數里縣人謂其地曰蛇
村是後廟不復著靈矣宋臨川王義慶宣驗記蟒死
於吳末庾仲雍荊州記晉初安世高以所得知亭廟
神財立白馬寺於荊州東南隅

水經註山廟甚神能分風擘流住舟遣使行旅過必
敬祀然後得去曹毗詩分風為二擘流為兩

吳郡太守張公直嘗與其妻女觀廟婢指女戲如其
夜公直妻夢神人來致聘甚懼洎明遽發至中流船
曳不前舟中咸懼曰奈何愛一女而禍一門耶公直

不忍令妻下女於江妻以其亡凡女代之船即前已
而公直知之怒曰吾何面目見天下人耶復下其女
於江既濟見二女立岸側無恙傍一吏曰我廬君主
簿也高君之義悉歸二女

幽明錄南州人有遷吏獻犀簪於孫權者舟過宮亭
廟而乞靈焉神忽下教曰須汝犀簪吏惶遽不敢應
俄而犀簪已列前矣神復下教曰俟汝至石頭城返
汝簪吏不得已遂行自分失簪且得罪死比達石頭
忽有大鯉魚長三尺躍入舟剖之得簪

潯陽記周訪嘗與諸商宿宮亭廟晨起如廁見廁舍

中有一白頭翁逐之則化為雄鴨將還舟且烹之諸
 商以為怪而兢視之鴨忽飛去
 冷齋夜話秦少游南遷時舟宿宮亭廟下見湖月光
 彩特異因憶管在西湖雲老惜竹軒所見景色與此
 不殊其夜夢美人自稱維摩散花天女以維摩像求
 贊少游愛其畫謂非吳道子不能作天女戲贈詩曰
 不知水宿分風浦何異秋眠惜竹軒聞道詩詞妙天
 下廬山對眼可無言少游贊曰竺儀華夢瘴面囚晉
 口雖不言十分似九應笑蔭覆大千作獅子吼不如
 博取妙善似陶家手既寤嘗自書之其真蹟後落雷

廬山州天寧寺

宮亭湖側為神林浦

南康志神林浦即神林湖在縣東五里

山疏神林之墟舊有曹彥約湖莊及觀時園今廢觀

時園記不知作者誰氏

神林浦東有蝦墓石今公廟

南康志蝦墓石在縣東十里枕湖今為雷所擊折其

皆

令公廟在蝦墓石上令公不知何神

蝦蟆石側有山為定山

舊志定山去縣東北二十一里竝湖山兩端大而中

小如金鋌

定山去縣東北二十一里

桑喬生曰山不骨不瘦不削不奇匡南山多純石背微負
土皆詭特稱幽賞然秀言開先偉稱五老予行攬觀之五
老尤瑰奇矣匡北山稍有土氣勢柔和二郡之人其稟受
亦畧相類云不賦詩者謂之

山麓有林之賦書以晉參隊賦并父賦神園今多曠

南東志南林無唱喻林賦王魏東五里

宮亭賦無喻林無

廬山紀事卷之六終

